

Iwwer die Rawe

Die Rawe, die bei uns in die Gärtte kumme, dess sinn Krähe. Sie haaße Rabenkrähe unn sinn vunn de Saatkrähe omm Schnawwel unn im Nestbau ze unnerscheide. Die Saatkräh baut ihr Nest in Kolonie, su e Kolonie kann merr uff de Risselsemer Mooseit seh: Wenn merr vunn Flerschem aus unn wenn de Verkehr dess zulosse dut, e bissi longsoomer fährt, sieht merr se gleich hinner de Brick uff de link Seit. Die Rawekrähe baue ihr Nest allo. Omm Schnawwel sinn se leicht ze unnerscheide: Die Rawekrah hott enn dorschgehend schwarze Schnawwel, bei de Saatkräh iss de Schnawweloosatz hellgrau. Egal wie, isch nenn die Art Veeschel oofach Rab oder Rawe.

Ferr e Kolonie sinn unser Gärtte hinnerm Haus ze kloo, awwer weil die Rawekrah ihr Nest ohne Gesellschaft baue dut, sieht merr immer mol oons in de Beem zum Nachbargrundstick. Unn dess Nest werdd su gebaut, dasses nitt vunn weidem ze sehe iss. Wer aus onnern Nestern Eier unn Jungveeschel nimmt, hott sellwer Regatt devor, soi Brut uff die Art unn Weis ze verliern.

Merr seet, die Rawe sinn die intelligenteste Veeschel. Koo Wunner also, wenn ooner vunn dene bei misch uff Besuch kumme iss (ha-ha!). Isch sitz vor e Woch wie immer mol beim scheene Wetter uff de Terrass unn guck in de blaue Himmel, doo kimmt enn Rab geflooe, lässt sich mett ausgestreckte Flitsch ins Gras falle unn hippt uff die Terrass zu. Vor de Terrassekont bleibderr stieh unn guckt misch oo. Iwwerichsens dun die Rawe, su wie ich geseh habb, uffem Boddem nitt nor gern hippe, naa, sie dun, wennse schunn ze Fuß sinn, eher schreiten als dorumlatsche. Sie halle debei de Kobb hoch und schreiten im Stechschritt hie unn her unn isch denk, der Rab waaß, wasser grad mächt unn dess mächt emm su rischdisch Spaß.

Der Rab guggt misch oo unn isch de Rab, unn doo denk isch, versuch isch doch emol, meddem ze babbele: Heh Rab, kumm e bissi näher, isch due derr nix. Saach emol, du kimmst doch iwwerall erum, erzähl merr mol, was drauße im Feld odder owwe onn de Wart los iss, isch kumm joo nimmi vumm Haus eweck. Su wie de guckts deesde joo gern ebbes saache, dess gieht halt nitt, obwohl merr saache dut, babbel su wie derr de Schnawwel gewachse iss. Waaßde Rab, isch deet gern emol wisse, ob de Familie host odder allo doo erum mächts. Awwer weil de Rab koo Antwort gewwe unn noch nitt emol de Schnawwel beweeschd hott, denk isch, der hott misch nitt verstonne – unn guck, jetz isser weggeflooe.

Was isch jetz erzähle due iss koo Erfindung vunn mir: Zwaa Daach späder sinn zwaa Rawe in de Gadde kumme, enn junge unn enn alte. Woher isch dess waaß: Ooner vunn dene, de junge, hott mett de Flitsch geschlaache, de Schnawwel uffgerisse unn gebetteld, unn doo hott werklisch der alde Rab – oder die ald Rabin – aach ihrn Schnawwel uffgemachd unn der junge Rab konnt jetz mett soim Schnawwel außem Elternkropf enn Happe Futter erausholle.